

և երկօքին աղգքս առաջի օտարաց առակ նշաւակի. և ո՞վ արդեօք լինէր սրարտաւոր արեանց անմեղաց. վասն որոյ երկուցեալ յառաջակայ վտանգէ և 'ի տկարութենէ իմմէ՝ և յայլ իրաց, գրեցի զգիրս աղերսանաց ազատել զիս 'ի գործոյ աստի՝ զի չեմ բաւական, կռիւն տեղոյս՝ ոչ է ըստ կռուոյ տեղոյդ, թէեւ ազգի նախանձ՝ այլ ես խոստովանիմ զտկարութիւն իմ յայդմ:

Եւ եթէ ընդ իս ցասուցեալ էք վասն հաշտութեանս՝ զոր արարի ընդ Յոյնս, այս էր սպայման հաշտութեան մերոյ. երկօքին աղգքս երդուաք 'ի Ս. Աւետարանն, չ'յիշել զանցեալն, և չյարուցանել զվէճս 'ի ներկայն, զի եթէ դուք զայդ ոչ կամիք՝ դուք գիտէք, այլ կալարուք զիս հրաժարեալ. նախ առաքեցէք զոք 'ի տեղի իմ, եւ ապա զկռիւն արարէք: Գոհանամ զԱստուծոյ՝ զի ոչ ինչ իմիք կարօտիք յօրհնեալ երկրիս յայսմիկ, զի ամենեքեան ցանկան տեղեաց ձերոց, զառաւելն կռուով և ատելութեամբ զի՞նչ ունիք առնել՝ ոչ վասն աղգացն ասեմ, այլ նոր վիճից վասն տեղեաց, զի եթէ նոքա ուխտազանց գտեալ զայլ իմն չարիս մտաբերիցեն վասն Ս. Աթուոյս և սեփական տեղեաց մերոց, յերես անկեալ աղաչեմ, արթուն լինել և կալ արիութեամբ, վառիլ 'ի սէր և 'ի նախանձ աղգային, և Տէր լիցի ձեզ օգնական. այլ որքան հնար է զխաղաղութեան զհետ երթայք. զի մեք այլ եմք՝ և նոքա այլ, մեք տկար՝ ժամանակն չար՝ երկիրս անտէրունչ՝ ամենայն ոք ինքնազլուիս՝ միտք և դիտաւորութիւնք երկրիս 'ի վերայ երկց վանաց՝ զոր Տէր փրկեսցէ. գրեալ յ7 նոյեմբեր ամսոյ:

